



Este xoves, membros de ADEGA, A. M. Augas Limpas, SGHN e Verdegaiá, en representación dos 16 colectivos contrarios á instalación dunha [mina a ceo aberto nas Fragas do Eume](#), trasladámoslle á Fiscalía as irregularidades observadas na tramitación deste proxecto. O Fiscal, Álvaro García Ortiz, acordou

abrir dilixencias preprocesais

para investigar as actuacións da administración neste caso e pedirlle máis información. A tramitación da mina de andalucita é outro exemplo do

proceder chafalleiro

e do

desleixo

da admnistración pola conservación do noso patrimonio natural: non se respectaron os prazos establecidos pola lexislación e o EIA presentaba escandalosas omisións, como non detallar os impactos da mina sobre o Parque Natural das Fragas do Eume, entre outras.



A aprobación deste proxecto, suporía a eliminación definitiva e irreversible dunha das fontes principais do Río Beelle, afectando gravemente tanto á cantidade como á calidade das súas augas, das que se subministra a unha poboación importante dos concellos de Ferrol, A Capela e Neda. Afectaría tamén ao P. N. Fragas do Eume, dado que a entulleira situaríase xusto sobre

rego Maciñeira, afluente do Eume, o que suporía unha grave contaminación por lixiviados, escorreduras, etc. E a franxa de amortecemento (50 m) non é suficiente para librar o Parque Natural das afeccións causadas pola contaminación da mina.

O xacemento de andalucita, un mineral usado en siderurxia e na fabricación de cerámicas refractarias, está na veciñanza do Pico Vello (área de alto valor, colindante e incomprendiblemente excluída do P. N. das Fragas do Eume). Está constituída na súa maior parte por unha fraga atlántica mesta e pasteiros, coa presenza de numerosas especies de fauna e flora con interese biolóxico, algunhas catalogadas como vulnerábeis. Esta fraga está incluída na proposta de ampliación da Rede Natura, e o monte Fontardiñón constitúe o único corredor ecolóxico entre o Parque Natural do Eume e L.I.C. Xubia-Castro. O permiso para esta explotación, suporía a perda deste corredor ecolóxico e a destrución irreversible dun inmenso patrimonio natural e etnográfico (fragas, regos, brañas, muíños, ...)



Como actividades complementares, as asociacións convocantes organizamos os seguintes actos:

-13 de maio, 19h: Charla na Casa da Cultura da Capela. Intervirán expertos e investigadores para tratar dos valores naturais da zona afectada e dos impactos da mina. Intervirán: Xabier Amigo, profesor de botánica da USC; Pero Galán, herpetólogo e profesor da UDC e Roberto Hermida, biólogo experto en morcegos.

-15 de maio: [roteiro reivindicativo polo Pico Bello](#) . Serán algo menos de 3 km sobre pistas e sendeiros, e o/as participantes poderán coñecer a fraga de Pico Vello. Está confirmada a participación de varios expertos que informarán sobre os aspectos xeolóxicos do xacemento, as afeccións da entulleira sobre os ríos, a morfoloxía do Fontardiñón (no que nacen ata 6 ríos e regatos), a fauna e a flora da zona e aspectos etnográficos como o aproveitamento dos soutos, a xestión dos regadíos, o funcionamento dos muíños... Pola tarde, visitaremos o Museo Etnográfico de A Capela.